

SENT

Partecipaziun da record a la Traversada

(anr/map) Mincha duos ons ha lö la gita chi traversa il territori dal cumün da Sent. La Traversada maina da la Chamonna Fenga (Heidelbergerhütte) a la Chamonna Sesvenna. Il traquet es 34.5 kilometers lung ed ha üna differenza d'otezza da 1670 meters. Passond dal territori da Ramosch la bunura tanter las 4.30 e las 5.00 as munta il Cuolmen Fenga, as passa lung la Val Chöglias fin a Griosch e Zuort per rivar al punct al plü bass, la punt da l'En pro sur En. Lura cuntinuescha il viadi aint da la Val d'Uina culs Puntins Ots, ils duos bains, las gallarias dal Quar, l'Alp Sursass in fittanza dals paurs da Damal e'l Pass da Schlingia. Ingon es gnüda realisada la 12avla ediziun pro cundiziuns idealas cun üna partecipaziun da 115 persunas, ün record. «29 dad els vegnan dal Vnuost, quai fa oura cha'l nomer es sur 100», disch ün dals respunsabels dal traquet, Cla Rauch, pro sia posa a Sur En. Là es radunada amo üna vainchina da persunas. Quistas gruppas, tenor prescripziun almain in duos, rivaran al böt intuorn las duos. «Chi chi nun es passà a las quatter in Uina dadaint faina tuornar», spiega ün dals fundatuors da la gita, Christian Juon. El ha laschè oura be üna Traversada ed es inchantà da

l'evenimaint: «Id es grondius e l'ora ideala. Uossa n'haja davo mai il toc il plü stantus, nempe quel da Tschern a Sur En chi va illa schnuoglia.» Georg Buchli ha fat tuottas 12 ediziuns, fa per la prüma jada insemel cun seis figl Not Armon e ria cuntaint: «Tuot va sainza problems, id es simplamaing grondius.» Anni Vetsch da Samignun e Gret Lippuner sun satisfattas da lur prestaziun: «Id es propcha üna sfida. No nu vain miss ingün böt mo pensain da rivar in Chamonna Sesvenna intuorn las 16.00.»

Per la prüma jada fa l'Ollandaisa Sanna Gierman la gita: «Tuot es nouv per mai. Eu nun ha ingün trenamaint mo i va bain. Dormi n'haja pac e pac bain mo eu sun persvasa da rivar al böt sainza problems.» Intant cha otras gruppas rivan a Sur En partan tschellas per l'ultim toc dal traquet. Ellas scrivan lur nom sco eir l'urari da partenza in üna glista. Da quista resulta cha la prüma gruppa es passada intuorn las ses e mezza e vuol batter il record da quatter uras e mez. Ma per la gronda part dals partecipants nun es la Traversada üna concorrenza dimpersè ün evenimaint da cumpagnia collià cun üna bella, lunga chaminada chi's fa be mincha duos ons.



Georg Buchli, seis figl Not Armon, Gret Lippuner ed Anni Vetsch (da davant vers inavo) sun rivats pro'l punct il plü bass da la Traversada, la punt a Sur En. fotografia: Mario Pult

SCHLARIGNA

Üna classa da nar

(anr/map) La sesevla classa A da Samedan ho fat visita i'l Chesin Manella a Schlarigna ed ho preschanto da sias lavuors da l'an. La classa vain mnedada da las duos magistras Claudia Cantieni e Chatrina Urech. Ellas as partan ils differents rams ed haun tratto düraunt l'an passo il tema da las punts. Claudia Cantieni ho tradieu ch'ellas hegian gieu la furtüna d'avair üna classa fich motiveda e disciplineada, premissas ideelas per realiser il proget previs. Que ho cumanzo culla lavur our il liber nempe a l'ur dal Flazinua cha las nouv scolaras e'ls set scolaras haun construieu punts cun crappa. Tenor lur magistra haun ils ifaunts pudieu cumbiner il plaschair, l'aventüra, la creativited e la collavuraziun. Püs scolaras haun quinto da lur experienzas. «Nus vains constato cha que vuol almain trais per fer üna punt», ho dit üna scolara ed ho tradieu cha ün pèr sajan ieus a cler ampas, üna scuierta chi tuocha tar tels progets. Ils ifaunts haun musso ed ex-posto lur ouvras in fuorma da fotografias. Chatrina Urech ho tratto las punts in lingua e scolaras e scolaras haun prelet e recito differentas poesias. Ella ho intimo ils ifaunts da scriver svesv poesias: «Aunz cu scriver svesv poesias as po invuler las idejas

dals poets.» Traunter ils differents blöchs as ho pudieu udir musica da guitarra scu eir chanzuns a duos vuschs cun accumpagnamaint da guitarra, traunter otras la cuntschainta chanzun da Mani Matter «Il svoul survavi las Alps» e las renomnedas «Engiadina» da Paulin Nuotclà ed «Il cumün insilenzi». Pergrand divertimaint ho pissero l'inchaunt dal disegn cha'ls 16 scolaras haun fat tenor l'originel da Giovanni Segantini. Ils preschaints, melavita na fich numerus, haun giodieu l'ura spüerta da quista classa activa chi ho glivro cun üna marena.

Il mneder dal Chesin Manella, Pol Clo Nicolay, ho auncha tradieu cha la concorrenza «30 dumandas in 30 minuts» hegia mno ad ün nouv record: be trais classas s'haun partecipadas. Illa prüma categoria ho guadagno la terza classa da Schlarigna cun sieu magister Jürg Pedrun. Il premi da la segunda categoria es ieu a la classa da Samedan, uschè ch'els haun survignieu üna pitschna peja per lur fadias. Seguonda es gnida la tschinchevla classa da Schlarigna d'Eric Agrippi. Las classas victoriosas clappan 100 francs per lur chascha da classa e lur fotografias sun expostas düraunt ün an i'l Chesin Manella.



Per realisar la preschantaziun da las scenas teatralas haja vulgü blera glieud. Ravarenda Christoph Schneider ingrazcha pel grond ingaschamaint. fotografia: Mario Pult

Zernez ha festagià il giubileum da sia baselgia San Maurizius

La Baselgia gronda d'eira bod massa pitschna

Avant 400 ons ha decis il chavalier Rudolf von Planta da far construir üna baselgia sül muot sur il cumün. La populaziun da Zernez ha rendü omagi a quist fabricat cun cult divin e scenas da teater.

(anr/map) Cur cha'ls sains han gnü fini da sunar d'eiran amo numerusas persunas in mandura simpla davant baselgia. Ellas, chi han giovà las scenas s-chaffidas da Jacques Guidon, nun han gnü lö in baselgia. E quista nun es nimia pitschna, ella ha lö per passa 400 persunas.

Il ravarenda da Zernez/Brail, Christoph Schneider, s'ha allegrà da la gronda preschentscha: «Dal 1620 as dovraiva be ün vers biblic ed alchünas urazchuns per implir la baselgia. Hozindi ans grataja quai almain pro ün giubileum.» Il president da la raspada, Jack Pinggera, ha intunà cha eir scha la baselgia saja imposanta e speciala stopcha la baselgia esser blier daplü co be ün stabilimaint. Chi saja la prüma vouta ch'el possa tgnair ün pled davent da la chonzla, ha manì il president da cumün, Domenic Toutsch, ed ha agiunt: «Eu speresch da nu far co quai chi vain dit dals politikers, nempe chi predgian aua e baivan vin.» El ha trat adimaint ün pèr fats istorics ed ha intunà l'importanza da la cumünanza pel cumün e per la cretta cristiana chi, sch'ella es ferma avuonda, nun haja da tmair otras religiuns. Lura ha segui üna cuorta predgia dal ravarenda chi ha express la persvasiun cha la fundamainta da la cretta possa be metter il Segner. La punt per las scenas teatralas ha fat ün «Kyrie eleison», üna melodia gregoriana impreschiunanta, chantada da vuschs virilas cun prechant e repetiziun.

Riassunt istoric fich bain concepi


Las scenas teatralas cumainzan cun l'evocaziun da las tesas cha Martin Luther ha clocchè vi da la baselgia a Wittgenstein. Lura aintra il reformatur Duri Champell. Sia preoccupaziun principala es da scriver ils psalms illa lingua dal pövel, in rumantsch. Travers, Bifrun e Gallicius sun seis exaimpels ed el as dosta cunter il maniamaint cha'l rumantsch nu possa gnir scrit. Sia fantschella til intimescha da scriver la lingua cun plets plü allegers. Lura vegnan ils cu-

vis chi imbütan a Champell d'avair sustgnü da sbandir ils sonchs our da la baselgia. Quist refüsa il rimprover ed intuna sia opposiziun invers las pussanzas estras chi tramettan agents per recutar mercenaris.

Lura fa il teater ün sigl da divers ons a l'on 1609. Il chavalier Rudolf von Planta vain cun sia cuorta a tour suot ögl il fabricat da la baselgia. El nun es cuntaint cun tuot, vess vulgü amo daplü chosas pumpusas ma es satisfat da verer sia vopna. Il ravarenda Bonaventura Toutsch manaja cha la baselgia saja massa pac simpla e modesta e neir a Planta nu plaschan las figüras chi espriman l'allegria.

Üna duonna dal pövel tira adimaint cha la construcziun da la baselgia haja miss in malura las famiglias. Per la scena finala ha fat tuot la raspada müdada giò la piazza dal chastè Planta-Wildenberg dingionder cha'l chavalier es gnü sbandi dal 1618.

Ils spectatuors han pudü seguir bain ils fats istorics e religios grazcha al concept cler da Jacques Guidon, chi, üna jada daplü, ha muossà seis geni linguistic e teatral. Il grond ingaschmaint davart da tuot la populaziun dal cumün es gnü bunifichà cun üna partecipaziun talmaing gronda cha la baselgia gronda es statta bod massa pitschna.



I nu manca plü blier

bcs. D'utuon 2007 es gnü cumanzà cullas lavuors preparatoricas pel fabricat da la Punt d'En chi collia davent dal 2010 ils cumüns da Scuol e Vulpera/Tarasp. Bainbod sun creschüts als duos pilasters our da la terra e las lavuors vi da la punt ed intuorn la punt sun avanzadas bain. Ils duos pilasters cun a dretta ed a schneistra üna part da la punt vegnan prosmamaing colliats. I mancan amo duos etappas fin cha la gronda part da la punt es glivrada. Davò cha'ls pilasters sun colliats seguan las lavuors culs attachs da la vart da Scuol e da Vulpera. Las lavuors sun tenor ils responsabels bain avanzadas e'l termin per dar liber la punt al trafic dal 2010 es realistic. Cura cha quai sarà precis dependa ferm da l'ora e da las influenzas naturalas sco naiv, strasoras ed oters impedimaints. Pel cumün da Tarasp, cul center turistic Vulpera, significha la punt ün surleivg in tuots regards. La via sur la punt riva novas pussibilitats e inrichescha la sporta sur l'En cun hotels, abitaziuns e piazza da golf a Vulpera ed a Tarasp ma eir pel Chastè da Tarasp.

fotografia: Benedict Stecher